



Segun comunicado manda pa Minister Arthur Dowers

Proyecto comunitario fantastico di KIA ta duna hobennan un impresion di bida diario den un prizon

ORANJESTAD-- Aruba 3 october 2013 : Diaranson na KIA a cuminsa un proyecto social nobo unda cu hobennan atendiendo scol secundario na Aruba ta wordo invita pa bishita KIA. Aki nan ta haya un recorrido y un bon impresion di bida diario den un prizon. E proyecto aki ta carga e nomber “Aki no tin wega,” y tin como enfoka pa muestra e hobennan cu “Crimen no ta paga”. Asina staf y personal di KIA, como tambe e detenido cu ta participa na e proyecto, ta spera di inculca den nos hobennan cu ta esencial pa nan caba nan scol y scohe e caminda corecto, kedando leu for di crimen. E klasnan di MAVO 3 di Filomena College tabata e prome alumnonan pa bishita KIA pa e proyecto aki. For di nan yegada por a ripara cu e hobennan inmediatamente a sinti cu un mundo completamente diferente ta spera nan paden di e murayanan di e centro di coreccion. Nan mes- ter a entrega nan celularnan na entrada y mester a pasa

den e mashin di scan, esaki ta indicacion directo cu “aki no tin wega”, segun miembro di KIA su team di maneho, Dick van Leenen ta splica.

Durante nan bishita e experiencia mas impactante tabata e encuentro y combersacion cu un preso.

“Maurits”, kende ta e detenido cu a duna su cooperacion na e proyecto, a splica e hobennan cu como mucha el a tuma decisionnan malo, el a scohe pa spijbel y no a caba scol, e tabata miembro di un gang, el a experiencia y participa na actonan violento y ladronicia. E detenido a conseha e hobennan pa tuma decisionnan corecto; pa sigui riba e caminda corecto y esaki a causa un impresion grandi riba nan. Su presentacion tabata hopi emocional y a los emocionnan tambe cerca e alumnonan y algun di e hobennan no por a contene nan lagrimanan.

E bishita tabata pa e studiantenan un combinacion balansa: un encuentro cu e realidad amargo di bida den un

institucion manera KIA, un advertencia pa corda semper tuma bon decision den bida y un demostracion di e trabao valioso y varia di e unidad K9.

“Aki no tin wega, no?” ta un iniciativa di e departamento di trabao social, cual ta dirigi na hobennan di 12 pa 15 aña, unda nan ta experiencia un encuentro cu KIA y su residentenan (detenidonan). E enfoka ta pa subraya na e

hobennan cu awo cu nan tin e edad pa tuma nan mesun decisionnan pa nan haci esaki cu consciencia y haci e escogencianan corecto.

E hobennan di Filomena College MAVO a haya un formulario di evaluacion pa yena y a expresa na final di e bishita cu “akiden si mi no kier ta”. Nan a describi e demostracion di e unidad K9 como “hopi interesante”, hasta tabatin algun estudiante cu a

expresa interes pa traha na KIA y algun ta pensando riba un carera como persona cu ta handle cachu di husticia. Esakinan ta opcionnan pa un futuro profesion cu nan no a pensa riba dje prome cu nan bishita. Un cos ta sigur, cu tur e hobennan a bisa cu nan no kier bolbe nunca como detenido, Hefe di e Departamento di Trabao Social di KIA, Sjariska Agumbero a conclui bisando. □